

Maradhi ya Kiroho na Kimwili Yaponywa

Naye alikuwa akizunguka katika Galilaya yote, akifundisha katika masinagogi yao, na kuihubiri Habari Njema ya ufalme, na kuponya ugonjwa na udhaifu wa kila namna katika watu—Mathayo 4:23.

Dunia hii ni nyumba ya wagonjwa wengi mno, lakini Yesu alikuja kuwaponya wagonjwa na kutangaza kuwekwa huru kwa mateka wa shetani. Yeye Mwenyewe alikuwa na afya na nguvu. Aliwapatia uzima Wake wagonjwa, wanaoteseka na wale waliopagawa na pepo. Hakumrudisha yeyote aliyekuja ili kupokea uweza Wake wa uponyaji. Alijua kwamba wale walioomba msaada Wake walikuwa wamejisababishia wenyewe magonjwa; na bado hakukataa kuwaponya. Na pale nguvu kutoka kwa Yesu ilipoingia ndani ya roho hizi maskini, waliona hatia ya dhambi na wengi waliponywa magonjwa yao ya kiroho, kadhalika na magonjwa yao ya kimwili. Bado injili ina nguvu iyo hiyo na kwa nini leo tusishuhudie matokeo yayo hayo?

Yesu anahisi huzuni ya kila anayeteseka. Wakati pepo wanaporarua mwili wa mwanadamu, Yesu anahisi mateso hayo. Wakati homa inapounguzwa mkondo wa uzima, anahisi maumivu yake. Na bado yuko tayari kuponya wagonjwa sasa kama wakati alipokuwa hapa duniani kimwili. Watumishi wa Kristo ni wawakilishi Wake, mifereji kwa ajili ya utendaji Wake. Anatamani kutekeleza nguvu Yake ya uponyaji kupitia kwao.

Katika namna ya uponyaji wa Mwokozi kulikuwa na masomo ya kujifunza kwa wanafunzi Wake. Katika tukio moja aliyapaka macho ya mtu kipofu matope na kumsihi, “Nenda kanawe katika birika ya Siloamu.... Basi akaenda na kunawa; akarudi anaona” (Yohana 9:7). Uponyaji uliweza kuletwa tu na nguvu ya Tabibu Mkuu, lakini Yesu alitumia wakala sahili wa asili....

Kwa wengi walioteseka ambao walipokea uponyaji, Yesu aliwaambia, “usitende dhambi tena, lisije likakupata jambo lililo baya zaidi” (Yohana 5:14). Hivyo alifundisha kwamba ugonjwa ni matokeo ya ukiukaji wa sheria za Mungu, za kimwili na kiroho. Taabu kubwa ulimwenguni isingekuwapo ikiwa watu wangeishi kwa kupatana na mpango wa Muumbaji.

Yesu amekuwa kiongozi na mwalimu wa Israeli ya zamani na Aliwafundisha kwamba afya ni tuzo ya utii kwa sheria za Mungu. Tabibu Mkuu aliyeponya wagonjwa huko Palestina alikuwa ameongea na watu Wake kutoka kwenye nguzo ya wingu, akiwaambia kile ambacho walilazimika kukifanya na kile ambacho Mungu angewafanyia. “Kwamba utaisikiza kwa bidii sauti ya Bwana, Mungu wako” Alisema, “na kuyafanya yaliyoelekea mbele zake, na kutega masikio usikie maagizo yake, na kuzishika amri zake, mimi sitatia juu yako maradhi yoyote niliyowatia Wamisri; kwa kuwa Mimi ndimi Bwana nikuponyaye” (Kutoka 15:26).... Pale walipotimiza masharti ahadi ilitibitishwa kwao. “Katika kabila zao hakuwepo mwenye kukwaa” (Zaburi 105:37) (Tumaini la Vizazi Vyote, sura ya 86).